

F A C T V M,  
Du procez pendant en la Cour.

POVR Messire Raoul Bretel, Cheualier, Seigneur de Gr<sup>e</sup>monuille & de Sauary, Conseiller du Roy en ses Conseils, & second President au Parlement de Rouen, Inthimé.

C O N T R E.

*Messire Georges Langlois, Seigneur de Plaimbosc, Conseiller du Roy en ses Conseils, & premier President en la Chambre des Comptes de Normandie, Appellant des Sentence des Requestes du Palais, & Demandeur contre les Religieux, Prieur & Conuent de la Chartreuse Nostre Dame de la Roze de Rouen, Deffendeur.*



Le sieur de Plaimbosc est appellant de quatre Sentences renduës aux Requestes du Palais, les 20. Fourier, 3. & 19. de May, & 7. de Septembre 1640.

La Sentence du 19. de May est la plus importante & considerable, comme celle qui iuge & decide l'Instance principale d'entre les parties: & de laquelle aussi ledit sieur de Plaimbosc auoit premierement releué appel, les appellations des autres Sentences n'estant qu'incidents, & pour retarder ou embarrasser le iugement du procez.

En l'Instance principale il s'agissoit des droicts honoraires en la Parroisse d'Estouteuille, que ledit sieur du Plaimbosc s'estoit voulu arroger, ayant apres le decez du sieur son pere fait apposer des litres & ceintures en ladite Eglise, qui sont les principales marques desdits droicts Honoraires; & n'appartiennent qu'au seul Patron.

Les Religieux Chartreux lesquels sont seuls Patrons de ladite Eglise, ayant sceu cette entreprise firent effacer vne partie de la

A



litre par vn Sergeant, qui en dressa procez verbal; ce qu'ayant esté empesché par le sieur du Plaimbosc, ils intenterent leur action aux Requestes du Palais à Rouen, pour faire condamner cette entreprise & effacer la litre: le sieur de Plaimbosc recognoissant le peu de droict qu'il auoit les rechercha d'accord, & par l'entremise de ses amis arresta leur poursuite, leur ayant fait promesse d'effacer entierement la ceinture funebre.

Cela donna sujet au sieur Inthimé qui possède le Fief de Sauary, tenu & mouuant du Roy, & plus de 2000. liures de rente dans ladite Parroisse, de se presenter aux Requestes, & de se rendre opposant de son chef contre ladite entreprise.

Son opposition ne receuoit pas de doute, & le sieur du Plaimbosc qui n'a iamais pretendu la qualité de Patron, & qui sçait bien que dans la Prouince de Normandie, s'est vne maxime constante que les honneurs de l'Eglise n'appartiennent qu'au Patron seul, & qu'il seroit condamné dès le premier iour, fit esuocquer l'Instance aux Requestes du Palais à Paris.

Ladite Instance y a esté instruite & iugée, & par Sentence du 19. May 1640. Il a esté dit à bonne cause l'opposition du sieur Inthimé, le sieur du Plaimbosc est condamné à effacer le litre & ceinture, à luy deffendu d'entreprendre les droicts Honoraires en ladite Parroisse, & condamné aux despens.

De cette Sentence le sieur du Plaimbosc releua premierement appel au chef de la condamnation de despens seulement, se recognoissant mal fondé au principal & y acquiesçant: mais comme il a veu qu'ayant contesté mal à propos & deffendu vn mauuais procez, & encore sur vne entreprise & vsurpation qu'il auoit voulu faire, qu'il ne meritoit aucune grace, & ainsi qu'il n'en pouuoit esuiter la condamnation des despens de la cause d'appel.

Il a voulu embarrasser le procez de nouvelles appellations, s'estant rendu appellant de la mesme Sentence, non au chef qui iuge l'opposition du sieur Inthimé & le condamne d'effacer les litres &



ceintures : mais au chef des deffenses de s'attribuer les droicts Hon-  
oraires en ladite qualité.

Et depuis il a aussi appelé des Sentences du 20. Feurier 3. May &  
7. Septembre 1640. dont la première ordonnoit qu'une Ordon-  
nance par luy surprise de contester sur la qualité de Seigneur d'E-  
stouteuille qu'il vouloit prendre seroit rapportée.

La seconde deboutoit les Religieux Chartreux d'une Requête,  
par laquelle ils auoient voulu interuenir au procez, & la troisieme  
auoit permis à l'Inthimé de faire oster les Armes que le sieur du  
Plaimbosc auoit fait mettre à l'une des vitres du Chœur de ladite  
Eglise d'Estouteuille.

Toutes ces appellations ont esté instruites entre les parties, &  
apres l'instruction d'icelles, le sieur du Plaimbosc pour encores em-  
barrasser & retarder le iugement du procez d'une année, a inthi-  
mé les Religieux Chartreux sur appellations des Sentences des  
vingtieme Feurier & troisieme de May mil six cens quarante:  
neantmoins ledit sieur de Gremonuille dira en passant que ledit  
sieur de Plaimbosc est mal fondé en toutes lescdites appellations &  
conclusions par luy prises. Supplie la Cour de considerer, que ce  
qui a donné lieu au procez a esté l'entreprise de l'Appellant de faire  
apposer des litres & ceintures en ladite Eglise, sans droict & sans  
qualité, laquelle entreprise & vsurpation il recognoist assez, puis  
qu'il n'a osé appeler de la Sentence au chef qui l'a condamné, au  
contraire en a souffert l'execution, les litres & ceintures ayant esté  
effacez par le Commissaire depute par la Sentence des Requestes  
du Palais, & partant l'opposition de l'Inthimé estoit tres-iuste.

Aussi est-ce vne maxime & vne regle en Normandie, & par le  
texte de la Coustume, & par l'usage de toute la Prouince, que les  
droicts honoraires n'appartiennent qu'au seul Patron, & que les litres  
& ceintures sont des principales marques des droicts honoraires.

Dé sorte que le sieur du Plaimbosc n'ayant cette qualité de Pa-  
tron, mais possédant seulement vn Fief dans ladite Parroisse, tenu



& mouuant d'un Seigneur particulier, qui est le Comte de Maulévrier : & l'Inthimé y possédant un Fief tenu & mouuant immédiatement du Roy, il estoit plus considerable que luy dans ladite Paroisse, tant par la qualité de leurs Fiefs, que par la prerogative de leurs charges.

Or ayant acquiescé au principal chef, qui est la condamnation de l'entreprise, les despens suivant le principal, il est certain qu'il a deub estre condamné : & apres d'auoir encores depuis appellé au chef qui luy fait deffenses de s'attribuer les droicts honoraires, est tres-mal à propos puisque lesdits litres & ceintures qu'il recognoist ne luy appartenir, ne sont pas d'autre nature que les autres droicts honoraires, lesquels tous n'appartiennent qu'au seul Patron, comme l'Inthimé a fait voir par les escrits du procez.

Car quand à la qualité de Seigneur d'Estouteuille, laquelle le sieur du Plaimbosc a voulu prendre, & surquoy il vouloit former vne nouvelle Instance, ayant fait ordonner sur Requeste que l'Inthimé contesterait sur ladite qualité, c'est avec iustice que Messieurs des Requestes iugerent par leur Sentence 20. Feurier que ladite Ordonnance comme surprise seroit rapportée.

Car en tout le procez l'on n'auoit point parlé de la qualité & denomination de leurs Fiefs, & il estoit iuste de decider les causes comme elles auoient esté formées & instruites sans les embarrasser de nouveaux incidents. Et quand bien le Fief du Plaimbosc s'appellerait aussi le Fief d'Estouteuille, cela ne changeroit en rien l'estat de la cause, ny ne donneroit pas de plus grands droicts à l'Appellant dans l'Eglise, puis qu'il demeure d'accord qu'il n'est point Patron.

Et toutesfois l'Inthimé n'a pas laissé de faire voir comme il est tres-bien fondé à empescher que l'Appellant ne s'attribue la qualité de Seigneur d'Estouteuille, puis qu'il ne possède qu'un seul Fief dans ladite Paroisse, dont la vraye & seule denomination est celuy du Plaimbosc dès le temps qu'il a esté separé du Comte de Maulé-



vrier, & qu'il iustifie par pieces authentiques & par le demembrement dudit Fief du Comte de Maulévrier: depuis lequel temps il n'a pas changé de nom, & ne l'a peu sans lettres du Roy: & que si pour estre assis en la Parroisse d'Estouteuille il en prenoit le nom, le sieur Inthimé auroit plus de sujet de le faire, par la dignité de son fief tenu immediatemēt du Roy, le nom duquel toutefois il n'a pas entrepris de changer, ny de se dire Seigneur de ladite Parroisse, estant certain que la seigneurie d'un Fief ne s'estend que sur son territoire & sur ses vassaux, & qu'il a esté iugé par plusieurs Arrests qu'il faut faire distinction des Fiefs qui n'ont autre nom particulier que celui du village où ils sont situez, d'avec ceux qui ont un nom particulier: comme remarque Monsieur Loüet en son recueil d'arrests souz la lettre F. num. 31. Or il demeure constant que le Fief de l'Appellant à un nom particulier, qui est celui du Plaimbosc.

Quand à la Sentence du 3. May qui deboutoit les Chartreux de leur interuention, l'appel n'en a par luy esté interjetté que pour les attirer en cause d'appel, pour empescher le iugement du procez, car ils auoient eu raison d'interuenir aux Requestes, puis qu'ils estoient les premiers qui auoient attaqué le Suppliant pour son entreprise; au prejudice dequoy il continuoit de se qualifier Seigneur d'Estouteuille, & ne fut leur interuention reiettée qu'en consequence de la declaration de l'Inthimé qu'il consentoit que la Sentence qui interuiendrait ne leur pût prejudicier: & si leur interuention eust esté reçeuë elle esloignoit le iugement de l'Instance, mais elle estoit prejudiciable audit Appellant, parce que faisant voir leur droit ledit Appellant eust esté condamné enuers eux.

Et pour le regard de ce qui est de la Sentence du 7. Septembre, qui permet à l'Inthimé de faire oster les armes que l'Appellant auoit fait mettre dans vne des vitres du chœur de l'Eglise, le iugement de cet appel despend de l'Instance principale, en laquelle l'Appellant a acquiescé pour le sujet des ceintures & litres, qui ne sont pas plus considerables marques des droits honoraires que les



6  
armes qui se mettent aux vitres du chœur, estant certain que le droit d'apposer des armes dans le chœur de l'Eglise est l'un des droits honoraires, & c'est une des principales marques du Patronage, qui n'appartient qu'au seul Patron; & en tout cas cet appel despend de la Sentence du 19. May qui desfendoit au sieur du Plaimbosc d'entreprendre aucuns droits honoraires en ladite Eglise, en consequence de laquelle ladite Sentence du 7. Septembre a esté rendue & executée par le mesme Commissaire de l'autre.

Mais quoy que l'Inthimé n'eust point d'autre partie que le sieur de Plaimbosc, toutefois ayant appris que sur l'inthimation qu'il a faite ausdits Religieux Chartreux, ils pretendoient se preualloir & tirer grand aduantage de leur qualité de Seigneurs, Hauts-Iusticiers, en consequence de laquelle ils se disent Seigneurs de la Parroisse d'Estouteuille, & s'arrogent les honneurs en icelle.

L'Inthimé quoy qu'il ne soit partie en ladite Instance a esté obligé de faire voir l'iniustice de cette pretention, & que lesdits Chartreux se doiuent contenter de la qualité de Patrons en ladite Eglise, & des droits qui sont attribuez aux Patrons, & que celle de Hauts-Iusticiers, ne leur donne aucunes prerogatiues en ladite Parroisse: leur Haute-Iustice ne s'estendant que dans leur territoire & sur leurs vassaux seulement, qui sont en tres-petit nombre, & non pas sur le reste de la Parroisse qui n'est pas de leur mouuance, & sur les hommes & vassaux des autres Fiefs, beaucoup plus grands & considerables que celui des Chartreux: estant certain que de la Parroisse d'Estouteuille une partie qui est du Fief du Plaimbosc qui releue du Comté de Maulévrier depend de la Haute-Iustice dudit Comté: & que l'autre partie depend de la Jurisdiction Royale à cause du Fief de Sauary qui appartient à l'Inthimé, & les terres dependantes dudit Fief: sur lesquelles la Haute-Iustice & Seigneurie des Chartreux ne se peut estendre. De sorte que l'Inthimé auroit autant de sujet qu'eux de se dire Seigneur de ladite Parroisse: mais chacun se doit contenter de sa qualité & de sa



Seigneurie. Par ces moyens supplie la Cour de luy adiuſger les con-  
cluſions qu'il a priſes par le procez.

Article 142. au chapitre des fiefs & droicts feodaux de la Cou-  
ſtume de Normandie. Celuy qui a fait don à l'Egliſe de ſon herita-  
ge, n'y peut reſclamer autre choſe que ce qu'il a expreſſément re-  
ſerué: neantmoins ſ'il luy a fait don de Patronnage ſans reſerua-  
tion les droicts honoraires deubs aux Patrons luy demeurent en-  
tiers, & à ſes hoirs ou ayant cauſe au Fief ou glebe auquel eſtoit  
annexé le Patronnage.

Ioſias Beraut commentateur de ladite Couſtume, remarque  
ſur ledit article l'vſage de la Prouince, & que par pluſieurs Arreſts  
il a eſté iugé, qu'autres que les Patrons ne peuuent auoir ſieges ny  
ſepultures dans le chœur, armaries en l'Egliſe, ny ceintures à  
l'entour d'icelles.

Ledit Beraut ſur l'article 154. de ladite Couſtume, dit ces mots,  
autrefois furent preſentées à la Cour Lettres obtenues par le ſieur  
de Breſé grand Senechal de Normandie, pour demembrer le Fief  
du Plaimboſc d'auec le Comté de Maulévrier, ſans que pour ledit  
démembrement ledit Comté fuſt diminué en ſes droicts, & furent  
icelles Lettres veriſiées, nonobſtant le contredit du Procureur Ge-  
neral, qui ſouſtint que les Duchez & Comtez ne ſe deuoient de-  
membrer eſtant cela prejudiciable au Roy.

Ce qui fait voir que le Fief du Plaimboſc dès ſon origine, & au  
meſme temps qu'il a eſté demembré du Comté de Maulévrier n'a  
eu qu'une dénomination qui eſt celuy du Plaimboſc, & non celuy  
d'Eſtouteuille, comme l'a voulu pretendre l'Appellant, qui eſt  
ſaiſi deſdites Lettres de démembrement, & de l'Arreſt interuenu  
ſur icelles.

Et qu'il eſt certain que le Seigneur du Plaimboſc à cauſe de ſon-  
dit Fief du Plaimboſc & les tenans & vaffaux d'iceluy, plaident en  
la Haute-juſtice dudit Comté de Maulévrier.

Comme l'Inthimé à cauſe de ſon Fief de Sauary qu'il poſſede

**dans la mesme Parroisse d'Estouteuille mouuant du Roy, à cause  
de sa Vicomté de Caudebec, plaide tant luy que ses vassaux & re-  
nants par deuant le Iuge Royal, qui est le Lieutenant du Bailly de  
Caux au siege de Caudebec.**